

TEZAUUR LITURGIC

4 IULIE

ACATISTUL SF. MUCENICI ROMANOVI DE LA MOSCOVA V



MOSCOVA, 2000



Акафист

**святым Царственным
страстотерпцам царю Николаю,
царице Александре, цесаревичу
Алексию, царевнам Ольге,
Татиане, Марии и Анастасии**

Кондак 1

Державнейшии заступницы яже на земли
Церкве Христовы, яко избавльшеся от злых
предстательством вашим, похвальная восписуем
вам. Вы же, яко имущии неусыпное о любящих
вас попечение, и за всех православных
милосердное заступление, от всяких нас бед
свободите, да всепраздненственне зовем
вам: Радуйтеся, многострадальнии мученицы
царственнии, державнии рода христианского
покровителие.

Икос 1

Ангели предстатели земли русстей, и всей
Церкви Христове абие по смерти явистеся, рода
Романова страстотерпцы чудодетельнии:
скончавшу бо ся земных страданий тяжкому
времени, изгнания и уничижений горькое в

радость вечную вам претворися: о, несказанныя славы ваша на небесех! Обаче не оставите нас, отцев законопреступных строптивых чад, но умилосердите Бога о поющих вам пение сицевое:

Радуйтесь, порфиросноснии страдальцы.

Радуйтесь, царей благоверных удобрение.

Радуйтесь, Царя Небеснаго вернии раби.

Радуйтесь, о верних рабех Царю Царей молящиися.

Радуйтесь, на небеси царствующии вечно.

Радуйтесь, на земли чтущих вас пред престолом страшнаго Царя поминающии.

Радуйтесь, багряное грехов кровьюми убелившии.

Радуйтесь, смирением и уничижением Царство вечное купившии.

Радуйтесь, славою несказанною сияющии.

Радуйтесь, Ангелы досточестно ублажаемии.

Радуйтесь, светлостью немерцаемою просвещаемии.

Радуйтесь, красотою божественною наслаждающиися.

Радуйтесь, многострадальнии мученицы царственнии, державнии рода христианскаго покровителие.

Кондак 2

Видя Царь самодержавный шатания языков и тщетных людей Своих умышления, возскорбел зело печалию Своею. Обаче уведев, яко прииде Ему час преити к Небесному Царю царей, до конца возлюби чада Своя, распинающыя Его, и молящеся о прощении им вся, зовый Богу: Аллилуиа.

Икос 2

Разумев Царствия Твоего земнаго скончание, не погубил еси упование Твое на Бога, О! многоскорбнейший Царю Николае, даже до конца веруя в любовь простых людей к Тебе. Ныне же мы, такового благочестивейшаго Государя, всем православным христианом в мире покровителя и Отца милостивейшаго лишившеся, уразумехом кольми Бога нашего преогорчихом. О! прегрешения нашего бездны! Но не отрини нас, со слезами покаяния восписующих Ти сия:

Радуйся, державнейший Православныя Церкви на земли покровителю.

Радуйся, предъизыщнейший Царю, всем по глаголу Христову служивый.

Радуйся, боготайный на земли Царя царей образе.

Радуйся, кротости и правды рачителю.

Радуйся, благочестивых российских царей украшение.

Радуйся, радуйся, благоверия прекрепкий блюстителю.

Радуйся, христолюбиваго воинства Твоего вселюбимый воеводо.

Радуйся, и последних людей Царствия Твоего милосердый печальниче.

Радуйся, милостивейший сирых и вдов защитителю.

Радуйся, матерей и детей всещедрый покровителю.

Радуйся, милостыни и помощи независтный подателю.

Радуйся, многих церквей и обителей святых строителю..

Радуйся, Царю наш сладчайший Николае, великий страстотерпче!

Кондак 3

Сила искушений и скорбей не возможе ослабити любви Твоея к Богу и народу русскому, о, великоименитая Царице Александро! Паче бо изволила еси страдати с людьми Божиими, нежели обрести на земли чуждей временный покой: верую же не прияла еси избавление

руками иноплеменник, да лучшее улучиши воскресение, поющи Богу: Аллилуиа.

Икос 3

Любве Христовы образ предлагаеши нам, о, Царице Александро многострадальная! Дивно Твое Бога истиннаго возлюбление, дивно Промыслу Божию послушание, дивно терпение тихое и кроткое страдальчество! Темже процвела еси яко белоснежный крин, в муках сладчайшее свое благовоние испустивый, и в скорбех изряднейшее доброты своея благозрачие показавый: о, богомудрия души Твоея! О, целомудрия красоты и нравов благородствия! Приими и от нас, недостойных хваление сицевое:

Радуйся, новая Девворо, матернее заступление о роде христианстем имущая.

Радуйся, новая Руф, яко людие русстии — людие Твои, и Бог православных — Бог Твой.

Радуйся, новая Иудиф, прибегающих к покрову молитв Твоих защищающая.

Радуйся, новая Есфирь, исполнение Церкви ходатайствы Твоими от пагубы сохраняющая.

Радуйся, добродетельми прекрасными сияющая.

Радуйся, яко светлый облак нас от бед покрывающая.

Радуйся, Царице наша, и по смерти нас не оставляющая.

Радуйся, мати наша, паче прежде о чадах Твоих пекущаяся.

Радуйся, лозо, сладкий плод нам возрастившая.

Радуйся, пять мучеников царственных нам в заступление родившая.

Радуйся, Софии новая, смертью от возлюбленных Супруга и чад Твоих неразлученная.

Радуйся, Александре древней крепкомудренно уподобившаяся.

Радуйся, Александро многострадальная, честнейшая Царице земли русския!

Кондак 4

Бурею страданий и скорбей не подвижеся сердце Твое, кротчайший Царевичу Алексие: от матерних бо пелен страданию обрученный, даже до последняго дне земнаго жития Твоего ярем Христов всеблагодушно носил еси, безропотно Промыслу Божию повинуюся, и всех нас, волнами страданий обуреваемых, во уповании и смирении Богу пети научая: Аллилуиа!

Икос 4

Слухи мятежными и страшных мук приближением не возмутися тихое Твое на Бога

упование, Отроче царственный, ибо
сладчайшаго Спаса Иисуса любви сердце Твое
озаряше: свеща горящая житие Твое на земли
бысть, юже и лютейшая страдания угасити не
возмогша: сего ради добродетелей Твоих
озареньми освещаемся и пети Тебе подвижаем
благоговением сицевая:

Радуйся, прекрасная любви Христовы свеще.
Радуйся, непорочныя девства доброты хранение.
Радуйся, за враги кротко молитися нас научаяй.
Радуйся, христианских добродетелей сияние нам
излучаяй.
Радуйся, от пелен болезни плоти безропотно
терпевый.
Радуйся, тем болезни наша и недуги исцеляти
благодать приемый.
Радуйся, целомудренною чистотою издетска
просиявый.
Радуйся, и нас от скверны мира сего сохраняяй.
Радуйся, милосердия Божия нам испрошаяй.
Радуйся, святыню девства любить научаяй.
Радуйся, Исааком древле прообразованному
Христу сообразне.
Радуйся, Царевичу Угличьскому Димитрию
смертию подобне.
Радуйся, многострадальне Царевичу Алексие,
отроком покровителю и страждущым
утешителю!

Кондак 5

Богожренныя агницы дщери цареви явишася, от безбожных гонителей Церкви Христовы жертву благовонну Цареве царей принесшеся, и светильники своя елеем девства, милосердия, кротости и боголюбия до конца светящияся соблюдше, свету невечернему Солнцу Христу во веки радуются и поют Ему песнь богокрасную: Аллилуиа!

Икос 5

Видящи, о, святая Царевно Ольго, страдания родителей царственных Твоих и разорение зрящи любимаго Отечества Твоего, не восхотела еси посягнути за князя иноплеменна, нетерпящи разлучения от возлюбленнаго дому Твоего, паче же хотящи сораспяться Христу, яко невеста непорочная Небеснаго Жениха. О, любви непреложныя сердца Твоего! Темже и нас не разлучайся предстательствующи присно о поющих Ти сице:

Радуйся, голубице, белостию девства блистающая.

Радуйся, Царевно, багряницею кровей красующаяся.

Радуйся, свеще благонравия богатносветлая.

Радуйся, невесто Христа светлопозлащенная.

Радуйся, равноапостольная Ольги целомудрию поревновавшая.

Радуйся, богославных княгинь рода христианского благочестием подражавшая.

Радуйся, святым царицам христианским равноревностно пожившая.

Радуйся, кротостию и чистотою Богоматере другиня бывшая.

Радуйся, в ризу страданий за Христа позлащенную одеянная.

Радуйся, к Богу и Царице Небесной колесницею мучительная смерти приведенная.

Радуйся, скорое Твое нам заступление в бедах подавающая.

Радуйся, за страждущее Отечество наше в молитвах с Богородицею неусыпающая.

Радуйся, всехвальная мученице Царевно Ольго, агнице Христова многострадальная!

Кондак 6

Проповедницы преизрядной любви Христовы, о, девицы царственнии, явистесь, долготерпением и крепким вашим в скорбех упованием на Бога: сего ради величаем добродетели и исправления, имиже яко сребро седмицею очищенно блистаетесь, и покланяющесь вам, радостно поем Богу: Аллилуиа!

Икос 6

Возсияла еси в земли россиястей яко пресветлая звезда, о, доброхвальная Татиано! Милосердым бо и смиренным Твоим служением больным, плененным, страждущим и в язвах лютых умирающим Христу Богу угодила еси: о, состраданиа Твоего! Темже даруй и нам недостойным добродетели сими обогатитися, да поем Тебе таковая:

Радуйся, страждущим светлая радости.

Радуйся, больным безсребренная целительнице.

Радуйся, плачущим тихое прибежище.

Радуйся, умирающим милосердия Божия ходатаице.

Радуйся, белостию добрых дел блистающая.

Радуйся, кротостию добрых нравов сияющая.

Радуйся, красотою девства Ангелы веселящая.

Радуйся, чистотою сердца Бога зрящая.

Радуйся, досадительства неверных людей долготерпевшая.

Радуйся, смертию за Христа добродетелей богатство запечатлевшая.

Радуйся, скоротлимага рубища земнаго жития совлекшая.

Радуйся, в златопорфирныя ризы небеснаго жития облекшаяся.

Радуйся, доброхвальная мученице Царевно Татиано, тихое пристанище скорбящим!

Кондак 7

Хотении божественными просвещаемы, вся скорби и лишения смиренно претерпели есте, девомученицы царственнии, юную плоть духу порабощающе, желания вся земная любовью ко Христу умерщвляюще, Егоже ныне невестолепно песнословите: Аллилуиа!

Икос 7

Новья жизни чающе, лучши нынешня прелестныя, боголюбезнии царевны Марие и Анастасие, во изгнании и уничижении утесняеми, яко сребро искушено седмерицею озаряестеся Духа утешеньми, и всею душею к Богу устремляестеся, молитвами многими, благоговейным в храмах Царю Небесному предстоянием и недвижимым на Спасителя Христа упованием. Обновите убо и сердца поющих вам песнь похвальную сие:

Радуйтесе, диадимою безсмертия от Царя славы венчаннии.

Радуйтесе, красотою несказанною от Христа на небесех почтеннии.

Радуйтесе, чистотою девства Духу

Божественному уневестившиися.

Радуйтесе, добротоу душевноу в Царствии Христове сияющии.

Радуйтесе, царственноу лепотоу вашеу Церковь Христову украшающии.

Радуйтесе, голубицы белья, в олтари Господни на крилу мук возлетевшии.

Радуйтесе, незлобием детским лукавствие темных умов посрамившии.

Радуйтесе, терпением крепким сети невидимых враг разтерзавшии.

Радуйтесе, смирением желчь супостатов ваших в сладость духовную преложившии.

Радуйтесе, простотоу оцет злобы нектар жизни вечныя соделавшии.

Радуйтесе, крестом уничижений Царство славы приобретшии.

Радуйтесе, смертию мучительноу жизнь прерадостную снискавшии.

Радуйтесе, царевни многострадальнии Марие и Анастасие, чистии невесты Христовы!

Кондак 8

Странни во Отечестве вашем, еже на земли, изгнаны правды ради, слугами сатанины ненавидимы, во узилици томимы, оскорбляеми и онеправдованы зрим вас, о, краснодушнии мученицы царственнии! Но аще и слезами

чистыми о людех прельщенных плакасте, и о погибели страны российскийя горьце сетовасте, обаче веровасте до конца, яко приидет светоносный день, воньже вся отечествия православных единеми усты и едином сердцем воспюют о вас песнь Богу: Аллилуиа!

Икос 8

Вся вселенная да ликовствует в нарочитый день праздника вашего, о, краснолепнейший лице царственных страдотерпец! Вся земля да приклонит колена пред несказанном величии страдания вашего, вси храмы православнии да возвышают сладкогласными трезвонны седмосветлое просияние славы вашея, вси вернии да поют вам во умилении хваления таковая:

Радуйтесь, земли русския всевожденнии предстателие.

Радуйтесь, всем православным всещедрии заступницы.

Радуйтесь, святыя Церкви нашея всесветлая радости.

Радуйтесь, всех любящих вас всечуднии покровителие.

Радуйтесь, всем уничиженным утешение.

Радуйтесь, всем озлобленным пристанище.

Радуйтесь, всем смятенным умирение.
Радуйтесь, всем колеблемым утверждение.
Радуйтесь, всем смиренным радование.
Радуйтесь, всем боголюбным празднование.
Радуйтесь, всем кротким озарение.
Радуйтесь, всем любобезмолвным умиление.
Радуйтесь, многострадальнии мученицы
царственнии, державнии рода христианского
покровителие!

Кондак 9

Вся страдания ваша недостойны к славе,
явленней в вас на небесех: за оставление —
богопрятие, за поругания — прославление, за
желчь и оцет — сладость вечную, за крест —
венец, за муки — рай, от Бога праведне прияли
есте, о превозлюбленнии! Мы же, тепле на
заступление ваше надеющиеся в веце сем и по
смерти нашея, немолчно поем о вас
Богу: Аллилуиа!

Икос 9

Ветии суемудреннии николиже уразумеют
величие славы и светлость праздника вашего!
Царя бо православнаго своего отвергшеся, и
суету мiра сего возлюбльше, иссохнут яко ветви
безплодныя, лишены крепостнаго заступления
вашего: мы же паче возлюбим вас и к вашему

многомощному ходатайству прибегающе,
возхвалим вы сие:

Радуйтесь, агнцы ради Агнца Христа убиеннии.
Радуйтесь, ангели, крилома молений чтущья вас
осеняющие.

Радуйтесь, незлобия и всепрощения образ нам
явившии.

Радуйтесь, любви к Богу, Отечеству и дому
своему всем правило бывшии.

Радуйтесь, глумления народа вашего с
кротостию претерпевшии.

Радуйтесь, смирением углие злобы враг ваших
угасившии.

Радуйтесь, непамятозлобия вашего ради Христу
всыновившиися.

Радуйтесь, за враги молившеся, невидимаго
супостата посрамившии.

Радуйтесь, добротворцев удобрение.

Радуйтесь, милосердия светлая зерцала.

Радуйтесь, благочестивых царей и цариц
красование.

Радуйтесь, многострадальнаго рода нашего
упование.

Радуйтесь, многострадальнии мученицы
царственнии, державнии рода христианскаго
покровителие!

Кондак 10

Спастися всем к вам прибегающим Творца и Зиждителя и Бога нашего умоляйте, яко не в силе Господь, но в правде: вы бо есте сокровище наше истинное, со всеми святыми Церкви наша, вы есте радость наша и утешение, и немолчное Троице Святей пение о вас возсылаем, зовуще: Аллилуиа!

Икос 10

Стена нерушимая и оплот Церкви истинныя бысть иногда самодержавнейший Царь православный: но отъяся от среды держай и беззаконие покры удел Пречистыя Богоматере, и пролияся кровь яко вода по всей стране российстей: но избави ны, Господи, и очисти грехи наша, молитв ради всех страстотерпец новых, наипаче же Царственных мученик дома Романова, слышащих благоуветливо от нас пения сия:

Радуйтесь, купнодушнии страдальцы, вседомовне души ваша за Христа положшии.

Радуйтесь, светильницы всесветлии земли российския.

Радуйтесь, правдою божественною сияющии.

Радуйтесь, добродетельми изрядными блистающии.

Радуйтесь, Православия благоревностнии на земли хранителие.

Радуйтесь, Церкви Христовы державнии покровителие.

Радуйтесь, благолепие дому Божию возлюбившии.

Радуйтесь, тем в место селения славы Божию водворившиися.

Радуйтесь, образ истинный супружества христианскаго явившии.

Радуйтесь, любовью божественною в конец солнцезрочно озарившиися.

Радуйтесь, на подвиг страданий небоязненно шествовавшии.

Радуйтесь, в мире душевнем даже до убиения вашего Господа терпевшии.

Радуйтесь, многострадальнии мученицы царственнии, державнии рода христианскаго покровителие!

Кондак 11

Пения благодарственная Богу во вся дни заточения вашего приносили есте от сердец кротких и смиренных: Ты же, Царице богохвальная Александро, непрестанное о научении детей своих Закону Божию попечение имела еси, и паче инех Бога за вся благодарила еси, верующи, яко по нощи мятежней паки

возсияет солнце правды и озарится земля светом истины: мы же, вере вашей дивящися, в покаянии зовем Богу: Аллилуиа!

Икос 11

Звезд светлейшии и солнца яснейшии светила земли российстей явистесья, и всех православных возлюбленнейший Царь и Царица, дражайшии по Бозе и Богородице заступницы, вседомовне просиявшии и седморичным светолитием сердца веселящи поющих вам радощами таковая:

Радуйтесь, рая прекраснаго жителие светозарнии.

Радуйтесь, Небеснаго Царствия украшения царственнии.

Радуйтесь, земнаго Отечества вашего сокровище дражайшее.

Радуйтесь, во мраце влающымся нам озарение светлейшее.

Радуйтесь, сердец наших утешение теплое.

Радуйтесь, умов наших просвещение ясное.

Радуйтесь, душ наших умирение пресладкое.

Радуйтесь, и телес наших покровение многонадеждное.

Радуйся, Царю Николае, и по смерти отеческое о нас имей попечение.

Радуйся, Царице Александро, матернее за дети наша с Богородицею являющая заступление.
Радуйся, Царевичу Алексие, от болезни и пагубы младенцы и отроки соблюдаяй.

Радуйтесь, царевни Ольго, Татиано, Марие и Анастасие, от душетленных зол юныя сохраняющие.

Радуйтесь, многострадальнии мученицы царственнии, державнии рода христианскаго покровителие!

Кондак 12

Благодать чудодейственную от Бога приемше, даже прежде прославления вашего на земли многая верным чудеса яviste, верою и любовию к вам прибегающим. Сего ради тщанием усердным к вам припадаем, и иконе вашей, яко самым вам сущим любовию кланяемся, чающе заступления вашего и в сем, и в будущем веце, ибо что вожденнейше нам, паче еже вкупе с Царем благочестивейшем и Царицею вселюбимою Небесному пети Царю во вся веки благодарно: Аллилуиа!

Икос 12

Поюще многая чудеса и заступления ваша, не вемы како возможем по достоянию изрещи вся нам дарованная вашим предстательством, о,

богославнии и царственнии нам заступницы!
Обаче примите и от нас приносимыя вам
венцы хвалений сия:

Радуйтесь, сущым в бедах скорыи избавителие.
Радуйтесь, сущым в скорбех радости подателие.
Радуйтесь, страждущым православным странам
заступницы.

Радуйтесь, гонимых Христа ради известнии
хранителие.

Радуйтесь, к вам прибегающим покрове,
ширший облака.

Радуйтесь, любовью чтущих вас многосветлое
веселие.

Радуйтесь, земли русския сокровище
неотъятное.

Радуйтесь, Церкви Православныя красото
священнолепная.

Радуйтесь, небосветлии звезды, светом
заступлений нас облиставающи.

Радуйтесь, неботочнии реки, водою благодати
нас напояющи.

Радуйтесь, нелюбовных нас любви научающи.

Радуйтесь, малодушных нас упованием на Бога
обогащающи.

Радуйтесь, иссохшая сердца наша умилением
умащающи.

Радуйтесь, омраченныя очи душевныя верою
просвещающи.

Радуйтесь, многострадальнии мученицы царственнии, державнии рода христианскаго покровителие!

Кондак 13

О, всеизряднии мученицы царственнии, радости, упование и славо наша! Приимите малое хваление сие, всем сердцем от нас недостойных вам приносимое, и испросите всем верою и любовью вас чтущым милости и покровения от всех бед и зол, избавления от глада, потопа, труса, меча, междоусобных брани и напрасных смерти, и будущих мук избавитися нам Господа умолите, да во вся веки с вами поем Творцу и Богу нашему: Аллилуиа, аллилуиа, аллилуиа!

Кондак сей глаголем 3-жды, и паки Икос 1. И поем Кондак 1: Державнейшии заступницы.



ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО